

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренијски савјет

R J E Š E N J E

**o koncentraciji privrednog subjekta AS d.o.o. Društvo za proizvodnju, trgovinu i transport
Jelah - Tešanj, i privrednog subjekta Vispak dioničko društvo za prehrambenu industriju
Visoko**

**Sarajevo,
decembar 2011. godine**



Broj: 06-26-1-021-15-II/11
Sarajevo, 8. decembar 2011. godine

Na osnovu člana 42. stav (1) tačka d), a u vezi s čl. 12., 14., 15., 16. i 18. Zakona o konkurenciji («Službeni glasnik BiH», br. 48/05, 76/07 i 80/09), u postupku pokrenutom po Zaključku o pokretanju postupka po službenoj dužnosti, broj: 06-26-1-021-1-II/11 od dana 12. oktobra 2011. godine, za ocjenu koncentracije privrednog subjekta AS d.o.o. Jelah - Tešanj, Društvo za proizvodnju, trgovinu i transport, Industrijska zona Ekonomija bb, Jelah, 74260 Tešanj, i privrednog subjekta Vispak dioničko društvo za prehrambenu industriju Visoko, Ozrakovići bb, 71300 Visoko, Konkurencijsko vijeće na 23. (dvadesettrećoj) sjednici održanoj dana 8. decembra 2011. godine, donijelo je

R J E Š E N J E

1. Ocjenjuje se dopuštenom koncentracija na tržištu proizvodnje prehrambenih proizvoda u Bosni i Hercegovini nastala sticanjem kontrole privrednog subjekta AS d.o.o. Jelah - Tešanj, Društvo za proizvodnju, trgovinu i transport, Industrijska zona Ekonomija bb, Jelah, 74260 Tešanj, nad privrednim subjektom Vispak dioničko društvo za prehrambenu industriju Visoko, Ozrakovići bb, 71300 Visoko, kupovinom većinskog paketa dionica.
2. Utvrđuje se da privredni subjekt AS d.o.o. Jelah - Tešanj, Društvo za proizvodnju, trgovinu i transport, Industrijska zona Ekonomija bb, Jelah, 74260 Tešanj, nije podnio Prijavu koncentracije u zakonom predviđenom roku, u smislu člana 16. stav (1) Zakona o konkurenciji, i da je proveo koncentraciju bez rješenja Konkurencijskog vijeća, u smislu člana 18. stav (9) istog Zakona.
3. Zbog kršenja Zakona o konkurenciji navedenih u stavu 2. ovog Rješenja izriče se novčana kazna privrednom subjektu AS d.o.o. Jelah - Tešanj, Društvo za proizvodnju, trgovinu i transport, Industrijska zona Ekonomija bb, Jelah, 74260 Tešanj, u iznosu od 50.000,00 KM, koju je dužan platiti u roku od 8 dana od prijema ovog Rješenja.

U slučaju da se izrečena novčana kazna ne uplati u navedenom roku ista će biti naplaćena prinudnim putem uz obračunatu zateznu kamatu za vrijeme prekoračenja roka, prema važećim propisima Bosne i Hercegovine.

4. Ovo Rješenje o koncentraciji upisuje se u Registar koncentracija.
5. Ovo Rješenje je konačno i bit će objavljeno u Službenom glasniku BiH, službenim glasilima entiteta i Brčko distrikta Bosne i Hercegovine.

O b r a z l o ž e n j e

Na osnovu informacija, objavljenih u pisanim i elektronskim medijima („Dnevni avaz“ od dana 17. januara 2011. godine; on line magazin „Sutra“ od dana 16. januara 2011. godine), da je

privredni subjekt AS d.o.o. Jelah - Tešanj, Društvo za proizvodnju, trgovinu i transport, Industrijska zona Ekonomija bb, Jelah, 74260 Tešanj (u daljem tekstu: AS Jelah - Tešanj) postao većinski vlasnik (s ukupno 83,93% dionica) privrednog subjekta Vispak dioničko društvo za prehrambenu industriju Visoko, Ozrakovići bb , 71300 Visoko (u daljem tekstu: Vispak - Visoko), nakon provedene tender ponude za kupovinu dionica koje su bile u vlasništvu malih dioničara i fondova, Konkurencijsko vijeće Bosne i Hercegovine (u daljem tekstu: Konkurencijsko vijeće) je provelo prethodne aktivnosti na prikupljanju dodatnih podataka.

Konkurencijsko vijeće je zatražilo, aktom broj: 01-26-10-188-1-I/11 od dana 12. jula 2011. godine, dokumentaciju od Registra vrijednosnih papira Federacije Bosne i Hercegovine d.d. Sarajevo, Maršala Tita 62/II, 71000 Sarajevo (u daljem tekstu: Registar vrijednosnih papira FBiH), o vlasničkoj strukturi privrednog subjekta Vispak - Visoko, koju je isti dostavio podneskom zaprimljenim pod brojem: 01-26-10-188-2-I/11 dana 15. jula 2011. godine.

Uvidom u dostavljenu dokumentaciju Registra vrijednosnih papira FBiH proizilazi da je privredni subjekt AS Jelah - Tešanj dana 14. jula 2011. godine imao 1.288.920 dionica, odnosno 84,6686% od ukupnog broja emitiranih dionica privrednog subjekta Vispak - Visoko, i da je dana 31. januara 2011. godine stekao preko 50,0% dionica u navedenom privrednom subjektu.

Također, Konkurencijsko vijeće je zatražilo, aktom broj: 01-26-10-188-I/11 od dana 12. jula 2011. godine, od Agencije za finansijske, informatičke i posredničke usluge d.d. Sarajevo, Ložionička 3, 71000 Sarajevo (u daljem tekstu: AFIP) finansijske izvještaje za 2009. godinu i 2010. godinu za privredni subjekt AS Jelah – Tešanj, i privredni subjekt Vispak - Visoko, koju je dostavio podneskom zaprimljenim pod brojem: 01-26-10-188-3-I/11 dana 20. jula 2011. godine.

Uvidom u dostavljene podatke AFIP-a proizilazi da je privredni subjekt AS Jelah – Tešanj u 2009. godini imao (..)**¹ KM, i u 2010. godini (..)**KM ukupan prihod, dok je privredni subjekt Vispak - Visoko u 2009. godini imao (..)**KM, a u 2010. godini (..)**KM ukupnog prihoda.

Na osnovu navedenih podataka o vlasničkoj strukturi i ukupnom prihodu Konkurencijsko vijeće je ocijenilo da postoji osnovana sumnja da je privredni subjekt AS Jelah – Tešanj kupovinom većine dionica privrednog subjekta Vispak - Visoka stekao kontrolu nad istim, u smislu člana 12. stav (1) tačka b) pod 1) Zakona o konkurenciji (u daljem tekstu: Zakon), i da je ispunjen uslov da najmanje dva učesnika koncentracije u Bosni i Hercegovini imaju ukupan prihod u 2010. godini (godini koja je predhodila koncentraciji) preko 8.000.000,00 KM, u smislu člana 14. stav (1) tačka b) Zakona, te da su učesnici koncentracije istu trebali prijaviti Konkurencijskom vijeću u skladu sa članom 16. Zakona. u roku od 15 (petnaest) dana od zaključenja sporazuma, objavljivanja javne ponude dionica ili sticanja kontrole, u zavisnosti od toga šta nastupi ranije.

Slijedom navedenog Konkurencijsko vijeće u skladu sa odredbama Zakona, donijelo je Zaključak o pokretanju postupka po službenoj dužnosti , broj: 06-26-1-021-1-II/11 od dana 12. oktobra 2011. godine (u daljem tekstu: Zaključak).

U smislu člana 33. Zakona Konkurencijsko vijeće je dostavilo Zaključak privrednom subjektu AS Jelah – Tešanj, aktom broj: 06-26-1-021-5-II/11 od dana 12. oktobra 2011. godine, na izjašnjenje, sa zahtjevom za dostavljanje dokumentacije, u smislu člana 33. stav (2) Zakona.

¹ (..)**- podaci predstavljaju poslovnu tajnu, u smislu člana 38 Zakona o konkurenciji

Privredni subjekt AS Jelah – Tešanj u ostavljenom vremenu je dostavio traženu dokumentaciju, podneskom broj: 06-26-1-021-6-II/11 zaprimljenim dana 2. novembra 2011. godine.

Konkurencijsko vijeće je zatražilo od privrednog subjekta AS Jelah - Tešanj, aktom broj: 06-26-1-021-8-II/11 od dana 14. novembra 2011. godine, dodatne podatke i dokumentaciju koju je isti dostavio podneskom broj: 06-26-1-021-13-II/11 od dana 23. novembra 2011. godine.

Konkurencijsko vijeće, u provedbi postupka ocjene predmetne koncentracije je primjenilo odredbe Zakona, Odluke o utvrđivanja relevantnog tržišta («Službeni glasnik BiH», br. 18/06 i 34/10), te Odluke o načinu podnošenja prijave i kriterijima za ocjenu koncentracija privrednih subjekta («Službeni glasnik BiH», broj 34/10).

Na osnovu dostavljene dokumentacije Konkurencijsko vijeće je utvrdilo:

1. Učesnici koncentracije

Učesnici koncentracije su privredni subjekt AS d.o.o. Jelah - Tešanj, Društvo za proizvodnju, trgovinu i transport, Industrijska zona Ekonomija bb, Jelah, 74260 Tešanj, i privredni subjekt Vispak dioničko društvo za prehrambenu industriju Visoko, Ozrakovići bb , 71300 Visoko.

1.1. Privredni subjekt AS Jelah –Tešanj

Privredni subjekt AS d.o.o. Jelah - Tešanj, Društvo za proizvodnju, trgovinu i transport, Industrijska zona Ekonomija bb, Jelah, 74260 Tešanj, osnovan 1995. godine je upisan u registar Općinskog suda u Zenici pod matičnim brojem: 43-01-0343-09 (stari broj: 1-6614) (JIB: 4218052620007) s upisanim osnovnim kapitalom od (.)**KM, s (.)**% vlasničkih udjela fizičkog lica Hrvić Sulejmana (lična karta: (.)**), Vukovo bb, 74260 Tešanj.

Pretežne registrovane djelatnosti privrednog subjekta AS Jelah – Tešanj su trgovina na veliko i malo prehrambenim proizvodima i robama široke potrošnje.

Privredni subjekt AS Jelah - Tešanj u Bosni i Hercegovini ima sedam filijala / veleprodaja (Zavidovići, Maglaj, Cazin, Visoko, Mostar, Ilidža i Tuzla) i šesnaest trgovina na malo (7 diskontnih prodavnica i 9 marketa), u Bosni i Hercegovini.

1.1.1. Povezana društva privrednog subjekta AS Jelah Tešanj

Privredni subjekt NAPREDAK, Fabrika konfekcije dioničko društvo Tešanj, Raduša bb, 74260 Tešanj (u daljem tekstu: NAPREDAK Tešanj), upisan je u registar Općinskog suda u Zenici, pod matičnim brojem: 43-02-0006-09 (stari broj: 1-6526 (JIB: 4218011350003), s upisanim osnovnim kapitalom (.)**KM, s (.)**% vlasničkim udjelom privrednog subjekta AS Jelah – Tešanj.

Pretežne registrovane djelatnosti privrednog subjekta NAPREDAK Tešanj su proizvodnja tekstilnih proizvoda, razne odjeće i rublja, trgovina na veliko i malo tekstilom i odjećom.

Privredni subjekt AS Jelah – Tešanj ima (.)**% vlasničkih udjela u privrednom subjektu Vemal d.d. Nesuha Mešića 1, 74260 Tešanj.

1.2. Privredni subjekt Vispak –Visoko

Privredni subjekt Vispak dioničko društvo za prehrambenu industriju Visoko, Ozrakovići bb, 71300 Visoko, osnovan 1972. godine, upisan je u registar Općinskog suda Zenica pod matičnim brojem: 43-02-0003-09 (stari broj: 1-3621) (JIB 4218308950000) s upisanim osnovnim kapitalom od (..) **KM i (..) **% vlasničkim udjelom (s danom 14. januara 2011. godine) privrednog subjekta AS Jelah - Tešanj.

Pretežne registrovane djelatnosti privrednog subjekta Vispak - Visoko je proizvodnja, prerada i trgovina prehrambenim proizvodima, prženje i pakovanje kafe.

2. Obaveza prijave koncentracije

Obaveza prijave koncentracije privrednih subjekta, u smislu odredbi člana 14. stav (1) tačka b) Zakona, postoji ako ukupni godišnji prihodi svakog od najmanje dva privredna subjekta učesnika koncentracije ostvareni prodajom roba i /ili usluga na tržištu Bosne i Hercegovine iznose najmanje 8.000.000,00 KM po završnom računu u godini koja je prethodila koncentraciji, ili ako je njihov zajednički udio na relevantnom tržištu veći od 40,0%.

Ukupni godišnji prihodi privrednih subjekta učesnika koncentracije (i s njima povezani privredni subjekti), na dan 31. decembra 2010. godine, iznose:

Tabela 1.

R.b.	Privredni subjekt	Svijet	Bosna i Hercegovina	Ukupno
1.	AS Jelah - Tešanj	(..) **KM	(..) **KM	(..) **KM
1.1.	NAPREDAK	(..) **KM	-	(..) **KM
2.	Vispak -Visoko	(..) **KM	(..) **KM	(..) ** KM

Izvor: Podaci privrednog subjekta AS Jelah Tešanj

Budući da su ispunili uslove ukupnog godišnjeg prihoda, u smislu člana 14. stav (1) tačka b) Zakona, odnosno da su najmanje dva privredna subjekta učesnika koncentracije u Bosni i Hercegovine imala ukupan godišnji prihod najmanje 8.000.000,00 KM (u godini koja je prethodila predmetnoj koncentraciji), isti su bili obavezni podnijeti prijavu koncentracije, u smislu člana 16. stav (1) Zakona.

Godišnji prihodi učesnika koncentracije (Tabela 1.) predstavljaju ukupne prihode (bez poreza na dodatnu vrijednost i drugih poreza koji se direktno odnose na učesnike koncentracije na tržištu Bosne i Hercegovine), u smislu člana 9. tačka h) Odluke o načinu podnošenja prijave i kriterijima za ocjenu koncentracija privrednih subjekta.

3. Pravni osnov i oblik koncentracije

Privredni subjekt AS Jelah Tešanj na osnovu Tender ponude s rokom od 30 dana (odobrene od Komisije za vrijednosne papire Federacije Bosne i Hercegovine, broj: 04/1-19-406/10 od dana 15. decembra 2010. godine) objavljene dana 17. decembra 2010. godine „Dnevnom avazu“, namjeravao je preko privrednog subjekta VGT BROKER d.d. Visoko, Alaudin 3, 71300 Visoko (ovlaštenog za prikupljanje odgovora na tender ponudu na osnovu zaključenog ugovora od dana 1. decembra 2010. godine) kupiti 942.081 ili 61,8849% redovnih dionica, po ponuđenoj cijeni 7,00 KM ili 70,0% nominalne vrijednosti dionice, od privrednog subjekta Vispak - Visoko.

Prije raspisivanja tender ponude privredni subjekt AS Jelah - Tešanj je imao 580.230 dionica ili 38,1151% udjela u privrednom subjektu Vispak - Visoko.

Tender ponudu je prihvatilo ukupno 122 vlasnika dionica privrednog subjekta Vispak - Visoko, te je privredni subjekt AS Jelah - Tešanj stekao ukupno 697.444, odnosno 84,6686% dionica predmetnog privrednog subjekta.

Na osnovu podataka Registra vrijednosnih papira FBiH privredni subjekt AS Jelah - Tešanj je stekao kontrolu nad privrednim subjektom Vispak - Visoko, dana 31. januara 2011. godine preuzimanjem preko 50,0% njegovih dionica.

Slijedom navedenog pravni oblik koncentracije predstavlja sticanje kontrole privrednog subjekta AS Jelah - Tešanj nad privrednim subjektom Vispak - Visoko kupovinom većine dionica, u smislu člana 12. stav (1) tačka b) pod 1) Zakona.

4. Analiza relevantnog tržišta

Relevantno tržište, u smislu člana 3. Zakona, te čl. 4. i 5. Odluke o utvrđivanju relevantnog tržišta, čini tržište određenih proizvoda/usluga koji su predmet obavljanja djelatnosti na određenom geografskom tržištu.

Prema odredbi člana 4. Odluke o utvrđivanju relevantnog tržišta u proizvodnom smislu, relevantno tržište obuhvata sve proizvode i/ili usluge koje potrošači i/ili korisnici smatraju međusobno zamjenjivim, pod prihvatljivim uslovima, imajući u vidu naročito njihove bitne karakteristike, kvalitet, uobičajenu namjenu, način upotrebe, uslove prodaje i cijene.

Nadalje, prema članu 5. Odluke o utvrđivanju relevantnog tržišta, relevantno tržište u geografskom smislu obuhvata cijelu ili dio teritorije Bosne i Hercegovine na kojem privredni subjekt djeluje u prodaji i/ili kupovini relevantnog proizvoda pod jednakim ili dovoljno ujednačenim uslovima i koji to tržište bitno razlikuje od uslova tržišne konkurencije na susjednim geografskim tržištima.

Relevantno tržište proizvoda u konkretnom slučaju je tržište proizvodnje i distribucije prehrambenih proizvoda (uključujući - čokoladni program, program kremova, sneck program, čajevi, supe i začini, slatki i praškasti program, kafa i ostali proizvodi - riža i šećer).

Prema registrovanim djelatnostima i dostavljenim podacima privredni subjekt AS Jelah - Tešanj nema značajnijeg preklapanja s proizvodnim asortimanom privrednog subjekta Vispak - Visoko.

Budući da učesnici predmetne koncentracije djeluju na cijeloj teritoriji Bosne i Hercegovine (preko distributera) relevantnim tržištem u geografskom smislu smatrat će se cijela teritorija Bosne i Hercegovine.

Slijedom navedenog, pod relevantnim tržištem predmetne koncentracije smatra se proizvodnja i distribucija prehrambenih proizvoda na cijelom teritoriju Bosne i Hercegovine.

Analizom proizvodnog asortimana privrednog subjekta Vispak - Visoko utvrđeno je da u segmentu prerade i distribucije kafe ima udio oko 6,0% na tržištu u Bosni i Hercegovini u 2010. godini, dok ostali proizvodi iz proizvodnog asortimana imaju manji tržišni udio.

5. Ocjena koncentracije

Konkurencijsko vijeće je nakon procjene i analize podataka i činjenica u postupku donošenja predmetnog Rješenja, u smislu člana 17. Zakona, utvrdilo da se radi o koncentraciji privrednih subjekta koji uglavnom ne djeluju na istom relevantnom tržištu, te da ista neće dovesti do ograničavanja ili narušavanja tržišne konkurencije.

Privredni subjekt AS Jelah - Tešanj predmetnom koncentracijom provodi dugoročnu strategiju proširenja svoje djelatnosti u prehrambenoj industriji, te u konkretnom slučaju preuzimanjem poznatih proizvodnih marki proizvoda privrednog subjekta Vispak - Visoko želi proširiti i svoj asortiman proizvoda na tržištu.

Slijedom navedenog Konkurencijsko vijeće je ocijenilo predmetnu koncentraciju dopuštenom u smislu člana 18. stav (2) Zakona, i odlučilo kao u dispozitivu ovog Rješenja.

6. Novčana kazna

Konkurencijsko vijeće, u smislu člana 49. stav (1) tačka b) Zakona, može izreći novčanu kaznu do 1,0% od ukupnog prihoda u prethodnoj godini poslovanja radi neprijavlivanja koncentracije u smislu člana 16. stav (1) Zakona.

Također, u smislu člana 48. stav (1) tačka e) Zakona radi provođenja koncentracije bez rješenja Konkurencijskog vijeća, u smislu člana 18. stav (9) istog Zakona, izriče novčanu kaznu privrednom subjektu do 10,0% od ukupnog prihoda u prethodnoj godini poslovanja.

Konkurencijsko vijeće je utvrdilo da privredni subjekt AS - Jelah Tešanj nije prijavio koncentraciju, u smislu člana 16. stav (1) Zakona, budući da je isti stekao kontrolu nad privrednim subjektom Vispak - Visoko, dana 31. januara 2011. godine, te da je zakonski rok za prijavu koncentracije istekao dana 15. februara 2011. godine.

Konkurencijsko vijeće je utvrdilo da je privredni subjekt AS Jelah - Tešanj proveo i registrovao predmetnu koncentraciju, bez rješenja o ocjeni koncentracije, u smislu člana 18. stav (9) Zakona, što potvrđuje i izvod Općinskog suda Zenica o vlasničkoj strukturi privrednog subjekta Vispak – Visoko.

Prilikom određivanja visine novčane kazne Konkurencijsko vijeće je uzelo u obzir da se radi o koncentraciji koja neće dovesti do promjena tržišnih udjela na relevantnom tržištu. Takođe, ova koncentracija će osigurati i novčana sredstva za privredni subjekt Vispak - Visoko, koja će istom omogućiti unaprijeđenje i rast proizvodnje, kao i zadržavanje broja zaposlenih.

Također, Konkurencijsko vijeće je uzelo u obzir da je privredni subjekt AS Jelah - Tešanj u potpunosti saradivao blagovremeno dostavljajući traženu dokumentaciju.

Na osnovu navedenog, Konkurencijsko vijeće je izreklo novčanu kaznu privrednom subjektu AS Jelah - Tešanj od 50.000,00 KM, što iznosi između 0,031 - 0,091% ukupnog prihoda ostvarenog u 2010. godini, kako je navedeno u tački 3. dispozitiva ovog Rješenja.

U slučaju da privredni subjekt AS Jelah - Tešanj ne izvrši uplatu izrečene novčane kazne u utvrđenom roku Konkurencijsko vijeće će zatražiti od relevantnih tijela prinudno izvršenje iste, te obračunati zateznu kamatu za vrijeme prekoračenja roka uplate novčane kazne, u skladu sa propisima Bosne i Hercegovine.

7. Pouka o pravnom lijeku

Ovo Rješenje je konačno i protiv istoga nije dozvoljena žalba.

Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objavljivanja ovog Rješenja.

Predsjednik

Ibrica Lakišić